

Li Hu reheb laj Hebreo

Li C'ajolbej nacutanobresi chiku li xlok'al li Acuabej Dios

¹ Najter k'e cutan li Kacua' Dios q'uila sut quixtaklaheb chak li profeta chixyebal li r̄atin riq'uineb li kaxe'tonil yucua'. Quixsiq'ui xyalal chanru nak tixch'olob xyalal chiruheb. ² Aban anakcuan macua'eb chic li profeta neque'yehoc re li r̄atin li Dios. A' chic li Dios C'ajolbej. Sa' xc'aba' a'an, li Dios quixyib li ruchich'och' ut chixjunil li c'a'ak re ru cuan. Chixjunil li quixyib quicana sa' ruk' li Dios C'ajolbej. ³ Li Ralal li Dios, a'an nacutanobresin re lix lok'al li Acuabej Dios. Ut a'an ajcui' nac'utuc chiku chanru lix na'leb. Li Ralal li Dios, a'an nacutun re li ruchich'och' riq'uin lix cuanquilal li r̄atin xban nak a'an yal re sa' xben li ruchich'och'. Ut nak ac xmayeja rib re risinquil li kamac, li Ralal li Dios co sa' choxa ut quic'oja sa' xnim uk' li Dios Acuabej, li k'axal nim xcuانquil.

Li Dios C'ajolbej k'axal nim xcuانquil chiruheb li ángel

⁴ Li cuanquil quiq'uehe' re k'axal nim cui'chic chiru xcuانquileb li ángel xban nak a'an li Ralal li Dios. Lix c'aba' quiq'uehe' xban li Acuabej Dios, a'an k'axal lok' cui'chic chiru lix c'aba'eb li ángel. ⁵ Nakanau nak k'axal lok' xban nak li Dios ma jun cua quixye re junak ángel:

Laat li cualal; anakcuan xinq'ue acuanquil. (Sal. 2:7)

- Chi moco quixye ta chirix junak ángel:
Lainak lix yucua' ut a'anak li cualal. (2 Sam. 7:14)
- ⁶ Nak quixtakla chak li junaj chi Ralal sa'
 ruchich'och', li Dios quixye:
 Chilok'onik ru xbaneb chixjunileb li ángel.
- ⁷ Quixye cui'chic li Dios chirixeb li ángel:
Xinyibeb lin ángel chanchaneb li ik' ut
 chanchaneb ajcui' li rak' xam nak
 neque'c'anjelac chicuu. (Sal. 104:4)
- ⁸ Aban li Dios quixye re li C'ajolbej:
La nimajcual cuanquilal, at Dios, xakxok chi
 junelic k'e cutan. Junelic sa' tiquilal nacat-
 taklan.
- ⁹ Li tiquilal nacuulac chacuu ut li mäusilal xic'
 nacacuil. Jo'can nak sic'bil acuu inban lain
 li nimajcual Dios. Lain la Dios. K'axal
 numtajenak li sahil ch'olej xinq'ue acue laat
 chiru li xinq'ue reheb chixjunileb la cuech
 aj c'anjelil. (Sal. 45:6-7)
- ¹⁰ Li Dios quixye cui'chic re li C'ajolbej:
Laat, at Kacua', sa' xticlajic cayib li ruchich'och' ut
 riq'uin ajcui' acuuk' cayib li choxa.
- ¹¹ Eb a'an te'osok' aban laat cuankat chi junelic.
 Chixjunil a'an te'k'elok' jo' li t'icr.
- ¹² Junak t'icr na-oso' ut najalman. Jo'can ajcui' nak
 t^äosok' li ruchich'och' ut li choxa.
 Aban laat inc'a' nacatjale'. Cuankat ban chi junelic
 k'e cutan. (Sal. 102:25-27)
- ¹³ Li Dios mä jun cua quixye re junak ángel jo'
 quixye re li Ralal:
 Tatl'ojlak sa' innim uk' toj retal tinq'ueheb rubel
la cuok li xic' neque'iloc acue. (Sal. 110:1)

¹⁴ Inc'a' quixye a'an reheb li ángel xban nak li ángel yal musik'ejeb chi c'anjelac chiru li Dios. Li Dios nataklan chak reheb chixtenk'anquileb li te'echanink re li colba-ib.

2

Li colba-ib k'axal lok'

¹ Xban nak li Cristo k'axal lok' chiruheb li ángel, jo'can nak takaq'ue kach'ol chixpabankuil li c'a'ru xkabi, re nak inc'a' t̄asachk sa' kach'ol lix yālal.

² Li esilal yebil xbaneb li ángel tz'akal yāl ut eb li inc'a' que'pāban ut eb li que'xk'et li chak'rab, que'xc'ul xtojbal xmaqueb jo' xc'ulubeb. ³ Cui eb a'an que'xc'ul xtojbal xmāc, ¿chan put ru nak tocolek' lāo chiru li tojba māc cui nakatz'ektāna li lok'laj colba-ib li quixyechi'i ke li Kacua' Jesucristo? Li Jesucristo quixyechi'i ke li kacolbal k'axal lok'. Ut chirix a'an, eb li que'abin re li rātin, a'an eb ajcui' que'ch'oloban lix yālal chiku. ⁴ Li Dios quixc'ut chiku nak tz'akal yāl a'an riq'uineb li retalil ut li milagro li quilajxbānu riq'uin lix nimal xcuangquilal. Ut naxc'ut ajcui' chiku nak yāl xban nak naxq'ue li Santil Musik'ej reheb li junjunk. Jo'can nak ac xmātan xmātan li junjunk jo' naraj li Dios.

Li Kacua' Jesucristo quitz'ejcualo' re kacolbal

⁵ Yoco chi atinac chirix li ac' ruchich'och' li tachālk. Li Dios inc'a' quixq'ue xcuanguileb li ángel re nak te'taklānk sa' xbēn a'an. ⁶ Jo'ca'in tz'ibābil sa' li Santil Hu:

At inDios, li cuink māc'a' xcuangquil. ¿C'a'ut nak nacac'oxlaheb? Li cuink māc'a'eb xcuangquil. ¿C'a'ut nak nacaq'ue ačh'ol chirixeb?

7 Xacubsi ca'ch'in xcuanyl chiruheb li ángel.
 Abanan xaq'ue xnimal xlok'al. Ut xaxakab
 xcuanyl sa' xbeneb la c'anjal xaban
 riq'uin acuuk'.

8 Laat xaq'ue chixjunil li c'a'ak re ru rubel xcuanyl li cuink. (Sal. 8:4-6)

Ut nak li Dios quixq'ue chixjunil li c'a'ak re
 ru rubel xcuanyl li cuink, mact'a' cuan inc'a' ta
 napaban chiru. A'ut anakcuan toj maji' nakil nak
 chixjunil li c'a'ak re ru cuan neque'paban chiru.

9 Abanan nakaq'ue retal chanru nak li Jesucristo
 quinimac ru ut quiq'uehe' xlok'al. Usta quicubasic
 xcuanyl jarubak cutan chiruheb li ángel, nak
 quitz'ejcualo', quiq'uehe' xlok'al xban li raylal
 quixc'ul nak quicam sa' kac'aba' lao. Xban lix ni
 mal rusilal li Dios, li Jesucristo quicam re xcolbal
 chixjunileb li cuanqueb sa' ruchich'och'. **10** Riq'uin
 xc'ulbal li raylal, li Jesucristo quitz'akobresic ru
 chiru li Dios. Li Kacua' Dios quiyiban re chixjunil
 li c'a'ak re ru. Xban a'an nak a' li Dios yal re sa'
 xben. Jo'can nak quixtakla chak li Jesucristo chi
 xc'ulbal li raylal ut quicam re xtojbal rix li kamac.
 Ut a'an ajcui' laj c'amol be chiruheb li ralal xc'ajol
 li te'tz'akonk sa' lix lok'al. **11** Lao nocosantobresic
 xban li Kacua' Jesucristo. Lao ut li Jesucristo junaj
 ajcui' li kachoxahil Yucua'. Xban a'an li Jesucristo
 inc'a' naxutanaç chixyebal nak lao lix herman.
12 Quixye chi jo'ca'in:

At inYucua', tinch'olob acuesilal chiruheb lin
 herman. Sa' xyankeb li ch'utch'uyqueb tin
 bicha la lok'al. (Sal. 22:22) **13** Ut quixye
 cui'chic:

Cauhak inch'ol riq'uin li Dios.

Ut quixye ajcui':
 Cue'quin arin lajn, cuochbeneb li ralal xc'ajol li
 Dios li xk'axtesi sa' cuuk'. (Is. 8:17-18)

¹⁴ Yal nak lao ut li Jesucristo junaj li kachoxahil Yucua'. Li Jesucristo quitz'ejcualo' jo'lao. Quicuan xquiq'uel. Quicuan xbakel ut xtibel. Li Jesucristo quicam. Riq'uin lix camic, li Kacula' Jesucristo quixsach xcuانquil laj tza, xban nak sa' xc'aba' laj tza nak cuan li camic. ¹⁵ Chalen chak sa' kayo'lajic, nakaxucua ru li camic. Aban riq'uin lix camic li Kacula' Jesucristo quirisi li kaxiu chiru li camic. ¹⁶ Relic chi yal li Kacula' Jesucristo inc'a' quichal chixtenk'anquileb li ángel. Quichal ban chixtenk'anquileb li ralal xc'ajol laj Abraham. (Ut lao ajcui' ralal xc'ajol laj Abraham, xban nak nakapab li Cristo.) ¹⁷ Xban nak li Jesucristo quic'ulun chixtenk'anquileb li cuanqueb sa' ruchich'och' tento nak quitz'ejcualo' jo' eb lix herman. Chi yal nak quitz'ejcualo' re nak taruxtana ku ut tixtoj rix li kamac. Li Jesucristo a'an lix yucua'il aj tij chi c'anjelac chiru li Dios. ¹⁸ Li Kacula' Jesucristo quixc'ul li raylal ut quiyale' ralenquil. Aban, inc'a' quixq'ue rib chi alec. Jo'can nak nim xcuانquil chixtenk'anquileb li neque'yale' ralenquil.

3

K'axal nim xcuانquil li Kacula' Jesucristo chiru xcuانquil laj Moisés

¹ Ex herman, laex sic'bil eru xban li Dios chok' ralal xc'ajol. Cheq'uehak ech'ol chixc'oxlanquil li Jesucristo. A'an li quitaklac chak xban li Dios chi c'anjelac jo' xyucua'il aj tij sa' li kapabal. ² Li Jesucristo quipaban chi tz'akal chiru li Dios li

quixakaban chak re chi c'anjelac jo' xyucua'il aj tij. Ut laj Moisés quip̄aban ajcui' chiru li Dios nak quic'anjelac chi c'amoc be chiruheb laj Israel. ³ Abanan li Jesucristo numtajenak cui'chic xlok'al chiru xlok'al laj Moisés. Li Jesucristo, a'an chanchan jun aj cablanel. Li ani nayiban junak cab, a'an k'axal nim xcuانquil sa' xb̄en usta k'axal ch̄abil li cab li naxyib. ⁴ Li junjunk chi ochoch cuan ani nayiban re; a'ut li quiyiban re chixjunil li c'a'ak re ru cuan, a'an li Kacua' Dios. ⁵ Relic chi yal nak laj Moisés quip̄aban chiru li Dios ut quic'amoc be chiruheb laj Israel. Quixch'olob xyalal li c'a'ru tac'ulmank mokon. Laj Moisés yal aj c'anjel chiru li Dios. ⁶ Aban li Kacua' Jesucristo, a'an tz'akal Ralal li Dios ut cuan xcuانquil chi taklanc sa' xb̄eneb li ralal xc'ajol li Dios. Lao li ralal xc'ajol li Dios cui ca'aj cui' riq'uin li Dios nocoyo'onin ut cauhak kach'ol sa' li kap̄abal toj sa' roso'jic li cutan.

Naru to-oc chi hilanc riq'uin li Dios

⁷ Li Kacua' Jesucristo k'axal nim xcuانquil. Jo'can nak takabi li r̄atin li naxye li Santil Musik'ej: Cherabihak anakcuán li cuatín.

⁸ Meb̄anu jo' que'xb̄anu l̄e xe'tonil yucua' nak que'xk'et chak li cuatín. Que'cuech'oc ut neque'ayaynac ut que'xyal inch'i'ch'i'inquil nak cuanqueb chak sa' li chaki ch'och'.

⁹ Aran que'xq'ue injosk'il l̄e xe'tonil yucua'. Chiru ca'c'al chihab que'r'il li usilal li quilajinbanu reheb. Abanan junelic yoqueb chixq'uebal injosk'il.

10 Xban a'an nak quinpo' inch'ol sa' xbeneb li tenamit a'in. Ut quinye: Junelic neque'xcuiba xch'oleb ut inc'a' neque'raj xbənunquil lix yalal. Inc'a' neque'xbənu li c'a'ru nacuaj.

11 Nak quichal injosk'il ut quinye, relic chi yal nak ma jok'e te'oc chi hilanc sa' li chabil na'ajej c'ubanbil inban, chan li Dios. (Sal. 95:7-11)

12 Ex herman, cheq'uehak retal nak ma jun taxak sa' eyank inc'a' tixpab li Dios xmac lix mausilal. Mare anchal tixtz'ektana li yo'yoquil Dios. **13** Cheq'uehak ban ena'leb cheribil erib rajlal cutan nak toj naru xbənunquil. Chetenk'a erib cheribil erib re nak ma jun tabalak'ik xban li mac, xban nak li nabalak'ic xban li mac inc'a' chic naraj xbənunquil li c'a'ru naraj li Dios. **14** Totz'akonk riq'uin xlok'al li Jesucristo cui nakaq'ue kach'ol chixpabanquil. Chanru nak xkatiquib chak xpabanquil li Kacua', jo'can taxak toj chalen sa' roso'jic li cutan. **15** Jo'ca'in tz'ibanol sa' li Santil Hu li quixye li Dios:

Cherabihak li cuatín anakcuan. Mecacuubresi ech'ol jo' que'xbənu chak le xe'tonil yucua' nak que'xk'et chak li cuatín. (Sal. 95:7-8)

16 ¿Aniheb li que'k'etoc chak re li ratin li Dios li quixye reheb? A'aneb chixjunileb li que'el chak Egipto nak laj Moisés quic'amoc be chiruheb.

17 ¿Ani sa' aj ben quijsk'o' li Dios chiru li ca'c'al chihab? Sa' xbeneb li que'macob ut que'cam sa' li chaki ch'och'. **18** Ut, ¿aniheb aj e quixye li Dios nak relic chi yal inc'a' te'oc chi hilanc riq'uin sa' li chabil na'ajej? Reheb li que'k'etoc re lix chak'rab. **19** Ut relic chi yal xbaneb lix k'etba atin, inc'a' que'oc chi hilanc sa' li chabil na'ajej.

4

¹ Li Dios toj yo ajcui' chixyechi'inquil li oc chi hilanc sa' li chabil na'ajej. Abanan chikabānu cuent re nak mā jun taxak sa' kayānk inc'a' tāoc sa' li hilobal a'an. ² Lao xkabi resil li colbabib jo' nak que'rabi resil najter. Abanan māc'a' qui-oc cui' reheb nak que'rabi xban nak inc'a' que'pāban. ³ Xban nak lao xkapab li Dios, tooc chi hilanc riq'uin sa' li chabil na'ajej. Li Dios quiatinaç chirixeb li kaxe'tonil yucua' nak quixye: Nak quichal injos'il, quinye nak relic chi yal mā jok'e te'oc chi hilanc cuiq'uin. Quixye a'an us ta ac ch'olch'o nak cuan li na'ajej re hilanc chalen nak li Dios quixrak lix c'anjel nak quixyib li ruchich'och'. ⁴ Tz'ibānbil sa' li Santil Hu chirix li xcuuk li cutan li naxye chi jo'ca'in: Ut li Dios quixrak lix c'anjel ut quihilan sa' xcuuk li cutan. (Gn. 2:2) ⁵ Ut tz'ibānbil ajcui' sa' li Santil Hu chirixeb li inc'a' que'pāban: Inc'a' te'oc chi hilanc cuiq'uin. (Sal. 95:11) ⁶ Que'rabi li rātin li Dios najter ut cuan li inc'a' que'oc chi hilanc riq'uin xban nak inc'a' que'pāban. Aban li ani napāban anakcuán toj naru tāoc chi hilanc riq'uin. ⁷ Najter cuanqueb laj Israel inc'a' que'pāban. Ut nak ac xnume' q'uila chihab, li Dios quixyechi'i cui'chic li hilobal nak quiatinaç riq'uin laj David. Ut laj David quixtz'iba li quiyehe' re li naxye chi jo'ca'in: Anakcuán cherabi taxak li cuatín ut mēcacuubresi lē ch'ol, chan. ⁸ Eb li que'pāban sa' xyankeb laj Israel que'oc chi hilanc sa' li na'ajej Canaán nak laj Josué quic'amoc be chiruheb. Abanan mācua' a'an li tz'akal na'ajej re hilanc chi junelic. Cui ta a'an li tz'akal hilobal, inc'a' raj chic quixye li Dios nak toj naru to-oc chi

hilanc riq'uin. ⁹ Jo'can nak toj cuan li lok'laj na'ajej re hilanc reheb li neque'paban re li Dios. ¹⁰ Li ani ac x-oc chi hilanc riq'uin li Dios, a'an ac xhilan chi tz'akal, jo' nak li Dios quihilan nak quixrak lix c'anjel. ¹¹ Chikaq'uehak kach'ol chixpabánquil li Dios re nak to-oc chi hilanc riq'uin. Ma ani taxak ke inc'a'taoc xban xk'etba qatin jo' que'xbanu chak junxil nak inc'a' que'paban. ¹² Li rātin li Dios yo'yo ut k'axal nim xcuanquil. Chanchan jun ch'ich' ca' pac'al xk'esnal. Riq'uin lix nimal xcuanquil, li rātin li Dios nacuulac toj sa' xchamal li kam. Ut naxc'utbesi chiku chanru li kana'leb ut chanru li kac'a'ux. ¹³ Ma ani naru tixmuk rib chiru li Dios xban nak a'an quiyibán re chixjunil li c'a'ak re ru cuan. Cutan saken chiru li Dios li kayehom kabānuhom. Mac'a' mukmu chiru li Dios li toxkach'olob cui' kayehom kabānuhom.

Li Kacua' Jesucristo, a'an tz'akal xyucua'il aj tij

¹⁴ Li Kacua' Jesucristo, li Ralal li Dios, a'an lix yucua'il aj tij chok' ke. Quitake' sa' choxa ut cuan chak riq'uin li Dios Acuabej. Yo chak chi oquenc chikix chiru li Dios. Jo'can nak cauhak taxak kach'ol sa' li kapabal. ¹⁵ Li Jesucristo a'an xyucua'il aj tij chok' ke lāo. Naxtok'oba ku xban nak naxnau nak moco k'axal cau ta li kach'ol. Nak quicuan arin sa' ruchich'och', li Jesucristo quiyale' ralenquil jo' nak nayale' kalenquil lāo. Aban li Jesucristo inc'a' quimacob. ¹⁶ Chotijok chi anchal kach'ol chiru li nimajcual Dios. A'an taril xtok'obal ku ut riq'uin xnimal rusilal toxtenk'a nak cuanko sa' junak raylal.

5

¹ Sa' xyankeb laj judío cuanqueb xyucua'il aj tij. Li junjunk sic'bil ru sa' xyankeb li cuink chi c'anjelac chiru li Dios. Naxtenk'aheb li tenamit riq'uin xq'uebal li mayej quic' ut li c'a'ak chic re ru chi mayejil re xtojbal rix lix mäqueb. ² Li xyucua'il aj tij, a'an yal cuinkkeb jo' lão. Jo'can nak naxtok'oba ruheb ut naxtenk'aheb sa' usilal li neque'macob xban nak inc'a' neque'xnau xyalal li yoqueb chixbänunquil. ³ Xban nak yal cuink li xyucua'il aj tij, jo'can nak rajlal namayejac re xtojbal rix lix mäc a'an. Ut namayejac ajcui' re xtojbal rix lix mäqueb chixjunileb li tenamit. ⁴ Lix c'anjel li xyucua'il aj tij k'axal lok', aban ma jun naxyo'ob xc'anjel yal xjunes rib. Eb a'an sic'bil ruheb xban li Dios. Li Dios naxxakabeb chi c'anjelac jo' nak quixakabac laj Aarón najter. ⁵ Jo'can ajcui' li Jesucristo. Moco yal xjunes ta quixxakab rib chi c'anjelac chok' xyucua'il aj tij. Aban li Dios quiq'uehoc re lix lok'al ut quixq'ue chi c'anjelac nak quixye re: At cualal, anakcuán xinq'ue acuanquil. (Sal. 2:7) ⁶ Quiyehe' cui'chic re xban li Dios jo' naxye sa' li Santil Hu: Laat aj tij chi junelic jo' nak quicuan laj Melquisedec. (Sal. 110:4) ⁷ Nak li Jesucristo quicuan arin sa' ruchich'och' quiyabac nak quitijoc. Chi cau xyab xcux quitz'aman chiru li Dios, li cuan xcuānquil chi coloc re chiru li camc. Ut li Dios quirabi lix tij xban nak quixk'axtesi rib re xbanunquil lix c'anjel li Dios. ⁸ Usta Ralal li Dios li Jesucristo, quixc'ul ajcui' li raylal ut quixc'ut chiku chanru li pabanc riq'uin li raylal quixc'ul. ⁹ Riq'uin li raylal li quixc'ul li Jesucristo quitz'akobresic ru chi

c'anjelac chok' xyucua'il aj tij. Ut sa' xc'aba' a'an cuan li colba-ib chi junelic reheb li te'pabank re. ¹⁰ Li Dios quixxakab li Jesucristo chok' xyucua'il aj tij jo' nak quicuan laj Melquisedec.

K'axal xiu xiu chok' ke cui tacuibank li kach'ol

¹¹ Toj cuan raj chic nabal naraj ch'olobac xyalal cheru chirix a'in. Abanan ch'a'aj xch'olobanquil xyalal xban nak inc'a' chic nequeraj rabinquil. ¹² Anakcuán ləex raj chic aj tzolonel xban nak ac junxil nequexpabán. Abanan təraj toj təc'utek' cui'chic cheru li ac xetzol chak junxil nak xepab chak li Dios. Chanchanex chic li c'ula'al li toj natu'uc li toj maji' natzacan. ¹³ Ləex nequenau nak junak c'ula'al toj natu'uc toj mact'a' xna'leb. Inc'a' naxnau bar cuan li us ut bar cuan li inc'a' us. ¹⁴ Eb li chequel cristian jalan xtzacaemkeb. Moco sic'bil ta ru li neque'xtzaca. A'an retalil nak ac xe'q'ui sa' xpabaleb ut neque'xnau chic bar cuan li us ut bar cuan li inc'a' us.

6

¹ Jo'can nak inc'a' yokex chi c'oxlac junes chirix li xetzol chak sa' xticlajic le pabal. Toj cuan ban nabal tətzol chirix li Cristo re nak texq'uik sa' le pabal. Ac nequenau nak mactua' riq'uin kayehom kabənuhom natauman li colba-ib. Riq'uin ban xpabankil li Dios. ² Ac nequenau xyalal li cubi ha'. Nequenau xyalal li xq'uebal li kuk' sa' xbeneb laj pabanel. Ac nequenau nak te'cuaclik cui'chic chi yo'yo li camenak. Ut nequenau ajcui' nak tacuulak xk'ehil nak tərakek' atin chi junaj cua sa' xbeneb li maji' neque'pabán. ³ Anakcuán chikaq'ue kach'ol chixtzolbal kib re nak toq'uik sa'

li kapabal. Jo'can takabánu cui li Dios naxq'ue ke.

⁴ Cuanqueb li ac xe'xtau xyalal. Xe'xc'ul li rusilal li Dios. Xe'xc'ul li Santil Musik'ej. ⁵ Neque'xnau nak yal li r̄atin li Dios. Ac xe'tz'akon ca'ch'in riq'uin lix cuanquil li ac' ruchich'och' li tachalk.

⁶ Cuan li ac xe'tz'akon riq'uin li rusilal li Dios ut neque'xtz'ektaña chirix xch'ol. Chanchan nak yoqueb cui'chic chixq'uebal chiru cruz li Jesucristo, li Ralal li Dios. Yoqueb chixq'uebal chi hobec' ut chi se'ec xbaneb li tenamit. Eb a'an inc'a' chic naru te'yot'ek' xch'ol ut inc'a' chic te'xjal xc'a'ux xban nak yoqueb chixtz'ektanquil li Jesucristo. ⁷ Li ani naxbānu li naxye li r̄atin li Dios, a'an chanchan li ch'och' naruc' li ha'. Chabil li acuimk na-el chiru ut nac'anjelac re laj acuinel. Li ch'och' a'an osobtesinbil xban li Dios. Li ani naxbānu li naraj li Dios osobtesinbil xban li Dios.

⁸ Aban li ani inc'a' naxbānu re li naxye li r̄atin li Dios, a'an chanchan li ch'och' junes q'uix ut yibru pim na-el chiru; m̄ac'a' na-oc cui' li ch'och' a'an. Li ani inc'a' naxbānu li naraj li Dios, tz'ektañanbileb xban li Dios ut c'atbil nak te'osok'.

Li Cristo nocoxtenk'a re nak inc'a' tach'inank li kach'ol

⁹ Ex inherman, usta xkaye chi jo'can, ninnau nak l̄ex moco jo'canex ta chic anakcuan. Chabil chic le na'leb xban nak colbilex. ¹⁰ Li Dios t̄ic xch'ol. Naxnau chanru le c'anjel. Li Dios naxnau nak nequera a'an. Nac'utun ajcui' nak nequera li Dios xban nak xetenk'a le rech aj p̄abanel junxil ut toj yoquex ajcui' chixtenk'anquileb anakcuan. Inc'a' nasach sa' xch'ol li Dios le c'anjel li nequebānu. ¹¹ Takaj nak chejunjunkalex

teq'ue ech'ol chixbānunquil li usilal chalen toj sa' roso'jic le yu'am. Chi jo'can tec'ul chi tz'akal le k'ajcāmunquil li yechi'inbil ere xban li Dios. ¹² Inc'a' nakaj nak tecuiba ech'ol. Chebānu ban jo' neque'xbānu li neque'pāban chi anchal xch'ol. Inc'a' neque'titz'. Neque'xcuy ut neque'rechani li yechi'inbil xban li Dios. ¹³ Mac'a' junak mas nim xcuānquil chiru li Dios. Jo'can nak li Dios quixpatz' xc'aba' chi ribil rib nak quixyechi'i li rosobtesinquil laj Abraham. ¹⁴ Quixye re: Relic chi yal tatcuosobtesi ut tinq'ue chi q'uianc la cualal ac'ajol. (Gn. 22:16-17) ¹⁵ Jo'can nak laj Abraham najt quixcuy roybeninquil ut inc'a' quititz' toj retal quixc'ul lix maṭan quiyechi'ic re xban li Dios. ¹⁶ Nak na-uxman li juramento napatz'man xc'aba' junak li k'axal nim xcuānquil re nak nach'ola ru li yal ut narake' ajcui' li cuech'inc ib. ¹⁷ Jo'can nak li Dios quixyechi'i li maṭan riq'uin juramento. Quiraj xc'utbal chiruheb li te'echanjink re nak tz'akal yal li yo chixyebal. Ut inc'a' tixjal ru li rātin. ¹⁸ Jo'can utan nak li cuib chi na'leb a'in inc'a' naru xjalbal ru. A'aneb a'in: xben, nak li Dios quixyechi'i li maṭan; ut xcab, nak quixbānu li juramento. Riq'uin a'an nakanau nak li Dios inc'a' natic'ti'ic. Jo'can nak cauhak taxak li kach'ol. Lao xkasic' li kacolbal riq'uin li Dios ut nakanau nak takechani li quixyechi'i ke. A'an li nakayo'oni. ¹⁹ Nakayo'oni nak takac'ul li junelic yu'am. A'an naxq'ue xcacuil li kach'ol jo' nak li ancla naxchap li jucub chiru li ha'. Cau rib ut inc'a' na-ec'an sa' xna'aj. Xban nak nakapab li Jesucristo, cuanco chi sum atin riq'uin

li Dios. ²⁰ Li Jesucristo ac xco sa' li santil choxa chi jaloc q̄tin chikix. A'an laj c'amol be chiku. Li Jesucristo, a'an tz'akal xyucua'il aj tij chi junelic jo' nak quicuan laj Melquisedec.

7

Laj Melquisedec

¹ Laj Melquisedec a'an li rey re li tenamit Salem. A'an ajcui' laj tij chiru li nimajcual Dios. Laj Melquisedec qui-el chak chixc'ulbal laj Abraham ut quirosobtesi nak quisuk'i chak chixsachbal ruheb li rey. ² Ut li jo' q'uial quirechani chak laj Abraham sa' li plet riq'uineb li rey, quixq'ue li junjunk sa' xlajetkil re laj Melquisedec. Li c'aba'ej Melquisedec naraj naxye "rey re li t̄quilal". Ut li c'aba'ej Salem naraj naxye "tuktuquil usilal". Jo'can nak laj Melquisedec, a'an rey re li t̄quilal ut rey re li tuktuquil usilal. ³ Inc'a' nanau-man ani lix yucua' laj Melquisedec chi moco lix na' chi moco lix xe'tonil yucua'. Inc'a' nanau-man chirix lix yo'lajic chi moco lix camic. Laj Melquisedec, a'an retalil li Jesucristo ut a'an laj tij chi junelic. ⁴ Q'uehomak retal nak laj Melquisedec, k'axal nim xcuانquil chiru laj Abraham. Laj Abraham, a'an xyucua'eb laj Israel, abanan quixq'ue re laj Melquisedec li junjunk sa' xlajetkil li quirechani chak sa' li plet. ⁵ Tz'ibabil sa' li chak'rab li quiq'uehe' re laj Moisés nak eb li cristian te'xq'ue reheb laj tij li junjunk sa' xlajetkil li c'a'ru cuan reheb. Eb laj tij, a'an eb li ralal xc'ajol laj Leví. Que'xb̄anu chi jo'can usta laj Abraham, a'an lix xe'tonil yucua' chixjunileb, laj

tij jo'queb ajcui' li cristian. ⁶ Laj Melquisedec mācua' xcomoneb li ralal xc'ajol laj Leví aban laj Abraham quixq'ue li junjunk sa' xlajetkil re laj Melquisedec. Nim xcuانquil laj Abraham xban nak ac yechi'inbil re li rosobtesinquil xban li Dios. Aban laj Melquisedec k'axal nim cui'chic lix cuانquil. Jo'can nak quirosobtesi laj Abraham. ⁷ Nakanau chi tz'akal nak li na-osobtesin, a'an li nim xcuانquil chiru li na-osobtesic. Jo'can nak nakanau nak nim xlok'al laj Melquisedec chiru xlok'al laj Abraham. ⁸ Eb laj tij aj Israel que'xc'ul ajcui' li junjunk sa' xlajetkil. A'aneb yal cuinkeb ut que'cam. Abanan laj Melquisedec moco quicam ta. Jo'can tz'ibebil sa' li Santil Hu. ⁹ Eb li ralal xc'ajol laj Leví, a'an eb laj tij. Eb a'an li que'c'uluc re li junjunk sa' xlajetkil li que'xq'ue laj Israel. Laj Abraham a'an lix xe'tonil yucua' laj Leví. Jo'can nak naru xyebal nak eb li ralal xc'ajol laj Leví que'xq'ue li junjunk sa' xlajetkil re laj Melquisedec xban nak laj Abraham quixq'ue li junjunk sa' xlajetkil sa' xc'aba'eb a'an. ¹⁰ Naru xyebal chi jo'can usta toj maji' neque'yo'la li ralal xc'ajol laj Leví xban nak laj Abraham, a'an lix xe'tonil yucua'eb. Riq'uin a'an nakanau nak laj Melquisedec nim xcuانquil chiruheb li ralal xc'ajol laj Leví. ¹¹ Li ralal xc'ajol laj Leví ut laj Aarón, a'aneb li neque'ch'oloban chiruheb laj Israel lix yalal lix chak'rab li Dios li quixye laj Moisés. Abanan chi moco li chak'rab chi moco eb laj tij li taruk tacolok ke. Cui ta eb laj tij ut li chak'rab, inc'a' raj chic quitaklac chak junak aj tij k'axal nim xcuانquil jo'nak quicuan laj Melquisedec. Laj tij li quitaklac chak mācua' xcomoneb laj Aarón. ¹² Laj tij li

quitakląc chak jalan chic lix c'anjel. Jo'can nak quijala ajcui' ru li chak'rab. ¹³ Li ątin a'in tz'ibanol chirix li Jesucristo. A'an macua' ralal xc'ajol laj Leví. A'an ralal xc'ajol laj Judá. Ma jun ralal xc'ajol laj Judá xakabanol chok' aj tij chi mayejac. ¹⁴ Laj Moisés, nak quiatinaç chirixeb laj tij, ma jun cua quixye nak sa' xyānkeb ta li ralal xc'ajol laj Judá taelk chak junak aj tij. Ut li Jesucristo quiyo'la sa' xyānkeb li ralal xc'ajol laj Judá.

K'axal nim xcuanquil li Jesús chiru xcuanquil laj Melquisedec

¹⁵ Riq'uin a'in nanauman nak li Jesucristo nim xcuanquil chiruheb laj tij li que'cuan sa' xyānkeb aj Israel. Li Jesucristo, a'an aj tij jo' nak quicuan laj Melquisedec ut a'an macua' ralal xc'ajol laj Leví. ¹⁶ Li Jesucristo inc'a' quixakabac chok' aj tij jo' quixye li chak'rab. Xakabanol ban chok' aj tij xban nak nim xcuanquil ut yo'yo chi junelic. ¹⁷ Jo'ca'in tz'ibanol sa' li Santil Hu chirix li Kacua' Jesucristo: Laat aj tij chi junelic jo' nak quicuan laj Melquisedec. (Sal. 110:4) ¹⁸ Jo'can nak li chak'rab li quicuan junxil mac'a' chic rajbal xban nak mac'a' chic xcuanquil. ¹⁹ Ma ani nacole' xban li chak'rab li quicuan chak junxil. Abanan cuan kayo'on anakcuán k'axal nim xcuanquil chiru li chak'rab. Li kayo'on, a'an li Jesucristo. Ut xban a'an cuanko chi sum ątin riq'uin li Dios. ²⁰ Li Jesucristo xakabanol chok' aj tij xban li Dios riq'uin juramento. ²¹ Abanan macua' riq'uin juramento nak que'xakabac chok' aj tij li ralal xc'ajol laj Leví. A'ut li Kacua' Jesucristo xakabanol chok' aj tij

xban li Dios riq'uin juramento. Tz'ib'anbil sa' li Santil Hu chi jo'ca'in:

Li Dios quiatinaq riq'uin li Ralal ut quixye re:
 Sa' inc'aba' lajn tanye acue: Laat laj tij
 chi junelic jo'nak quicuan laj Melquisedec,
 chan. Li Dios inc'a' tixjal lix c'a'ux xban nak
 quixpatz' lix lok'laj c'aba'. (Sal. 110:4)

²² Riq'uin li juramento a'in, sa' xc'aba' li Jesucristo, nim xcuanguil li ac' contrato, ut k'axal lok' chiru li quicuan junxil. ²³ Najter nabaleb laj tij que'cuan chak. Inc'a' que'cana sa' xc'anjel chi junelic li junjunk xban nak neque'cam ut jalan chic nacana chok' rekaj. ²⁴ Aban li Kacua' Jesucristo a'an chic li tz'akal laj tij. Ma jaruj chic tasic'mank junak rekaj xban nak a'an yo'yo chi junelic. ²⁵ Li Jesucristo a'an tz'akal tacolok reheb chixjunileb li neque'paban re li Dios sa' xc'aba' a'an. Li Jesucristo yo'yo chi junelic ut naqtinac chirixeb chiru li Dios. ²⁶ Li Kacua' Jesucristo, a'an li tz'akal xyucua'il aj tij. Ut a'an li natenk'an ke chi tz'akal. Moco juntak'et ta lix yu'am riq'uineb laj mac. Li Jesucristo santo ut mac'a' xmac. A'an co sa' choxa ut aran quiq'uehe' xnimal xlok'al. ²⁷ Li Jesucristo macua' jo'queb lix yucua'ileb aj tij li que'cuan sa' xyankeb laj Israel. Eb a'an cuulaj cuulaj neque'xmayeja li xul re xtojbal rix lix maqueb jo'ajcui' lix maqueb li tenamit. Aban li Jesucristo jun sut ajcui' quixmayeja rib re xtojbal rix li kamac. ²⁸ Jo' tz'ib'anbil sa' li chak'rab najter, eb li xakababil chok' xyucua'il aj tij, a'an yal cuinkeb. Abanan mokon, nak quisache' xcuanguil li chak'rab, li Dios quixxakab riq'uin juramento li Ralal chok' xyucua'il aj tij. Riq'uin ut a'an

li Jesucristo tz'akal re ru chi c'anjelac chi junelic.

8

Li Jesucristo, a'an xyucua'il aj tij chok' ke lao

¹ A'an a'in xyālal li yōoco chixyebal ere: yal nak cuan jun tz'akal xyucua'il aj tij nac'anjelac chikix. A'an li Jesucristo li c'ojc'o chak sa' xnim uk' li Dios sa' lix nimajcual xcuanquilal sa' choxa. ² Li Jesucristo nac'anjelac sa' li Santil Na'ajej sa' choxa li yibānbil xban li Dios, ut mācua' sa' li na'ajej yibānbil xbaneb li cuink. ³ Chixjunileb li xyucua'il laj tij xakabānbileb chi mayejac xul ut c'a'ak chic re ru chi mayejil. Jo'can ajcui' li Jesucristo tento tixq'ue junak mayej. ⁴ Cui toj cuan ta arin sa' ruchich'och' inc'a' ajcui' tac'anjelak jo' junak rebeb laj tij xban nak eb laj tij neque'mayejac jo' naxye lix chak'rab laj Moisés. ⁵ Li c'a'ru neque'xbānu eb laj tij yal jun retalil li na-uxman sa' li choxa. Nakanau nak yal retalil xban li c'a'ru quiyehe' re laj Moisés nak oc re chixyibānquil li tabernáculo. Li Dios quixye re: Chaq'ue retal ut chabānu chixjunil jo' li retalil quinc'ut chācuu sa' xben li tzul Sinaí. (Ex. 25:40) ⁶ A'ut lix c'anjel li Jesucristo numtajenak xcuanquil chiru li que'xbānu chak eb laj tij junxil. Sa' li ac' contrato li Jesucristo chic naqtinac chikix chiru li Dios. K'axal chabil li ac' contrato xban nak riq'uin a'an k'axal lok' cui'chic li yechi'nbil ke xban li Dios. ⁷ Cui ta tz'akal re ru li contrato quixbānu chak junxil inc'a' raj chic quixq'ue junak ac' contrato. ⁸ Aban li Dios quiril nak inc'a' us yoqueb chixbānunquil li tenamit li cuanqueb

- rubel xcuanquil li xben contrato. Jo'can nak quixye reheb li tzibanbil sa' li Santil Hu:
 Tacuulak xk'ehil nak tinbanu junak chic li ac'
 contrato riq'uineb li tenamit Israel ut Judá.
- ⁹ Li contrato a'in macua' jo' li quinbanu chak
 reheb lix xe'tonil yucua'eb nak quicuisi-
 heb chak sa' li tenamit Egipto. Inc'a'
 que'xbanu li naxye li contrato. Xban a'an
 quebintz'ektana.
- ¹⁰ A'in li contrato tinbanu riq'uineb reheb laj
 Israel. Tacuulak xk'ehil nak tinq'ue lin
 chak'rab sa' lix c'a'uxeb ut tinq'ue ajcui' sa'
 li rameb. Lainak lix Dios ut a'anakeb lin
 tenamit.
- ¹¹ Inc'a' chic te'xch'olob xyalal chikuix chiruheb li
 ras ritz'in xban nak chi coc' chi nink te'xnau
 chic anihin.
- ¹² Tincuy lix maqueb ut ma jun cua chic tinc'oxla
 lix masilaleb, chan li Dios. (Jer. 31:31-34)
- ¹³ Nak li Dios quixye nak tixbanu jun chic li ac'
 contrato a'an naraj naxye nak li najter contrato
 yo chi sachc xcuanquil ut mac'a' chic xc'anjal
 tacanak.

9

Li Tabernáculo a'an retalil li choxa

- ¹ Li xben contrato cuan xchak'rab naxye chanru
 nak nalok'oniman li Dios ut cuan jun li muhebal
 re lok'oninc yibanbil xbaneb li cuink tabernáculo
 xc'aba'. ² Jo'ca'in nak yibanbil li na'ajej. Tasbil sa'
 xyi riq'uin jun nimla t'icr. Sa' li xben tasal cuan
 li candil cuukub xxamlel ut cuan ajcui' li mex bar
 naq'ueman cui' li mayejanbil caxlan cua. Li xben

tasal a'an Santil Na'ajej xc'aba'. ³ Li na'ajej li cuan jun pac'al li t'icr, a'an Lok'laj Santil Na'ajej xc'aba'. ⁴ Aran cuan jun xc'atbal li pom yibanol riq'unin oro, ut cuan ajcui' jun li Lok'laj Cax letzbal oro chirix. Chi sa' li Lok'laj Cax a'an cuan li xar oro bar cui' c'ulanbil li maná. C'ulanbil ajcui' sa' li cax lix xuk'laj Aarón li quituxmec ut qui-atz'umac. Ut c'ulanbil ajcui' aran li cuib chi pec tjc ru li tz'ibanol cui' li lajeb chi chak'rab. ⁵ Ut sa' xben li Lok'laj Cax cuan cuib li querubines yibonbileb riq'unin oro chanchaneb li ángel. A'an retalil nak cuan li Dios aran. Lix xiq'ueb naxc'ul rib sa' xben lix tz'apbal re li cax bar naq'ueman cui' li mayej quic' re xcuybal li mac. Abanan anakcuán inc'a' takach'olob nabal chic chirix a'an. ⁶ Jo'ca'in nak que'c'anjelac sa' li na'ajej li que'xlok'oni cui' li Dios. Rajlal cutan que'oc laj tij sa' li xben tasal chixbanunquil lix c'anjel. ⁷ Aban sa' lix cab tasal ca'aj cui' li xyucua'il aj tij na-oc jun sut chiru li jun chihab. Ut nak na-oc sa' li Lok'laj Santil Na'ajej a'an, naxc'am xquiq'uel li xul ut naxmayeja re tacuyek' lix mac a'an ut re ajcui' nak tacuyek' xmaqueb li tenamit. ⁸ Riq'unin li atin a'in, chirix li lok'oninc junxil sa' li tabernáculo, li Santil Musik'ej naxc'ut chiku nak moco yalak ani ta naru na-oc toj chi sa' li Lok'laj Santil Na'ajej riq'unin li Dios xban nak toj cuan xc'anjel li najter chak'rab chiruheb ut toj yoqueb chi c'anjelac sa' li xben tasal. Jo'can nak li xben tasal a'an naramoc re li oquebal chiruheb sa' li Lok'laj Santil Na'ajej. ⁹ Chixjunil a'in, a'an jun retalil chok' ke anakcuán nak junxil quilaje'mayejac. Aban li c'atbil mayej ut li c'a'ak chic re ru chi mayejil inc'a' quirisi lix maqueb.

10 Sa' lix pábaleb junxil cuan li chak'rab chirix li c'a'ru te'xtzaca ut c'a'ru te'ruc' jo' ajcui' chanru nak te'ch'ajok re xsantobresinquileb rib. Usta inc'a' quijala lix na'lebeb, aban tento que'xbənu li chak'rab a'an toj quicuulac xk'ehil nak li Dios quixjal nak quixq'ue li ac' na'leb. **11** Aban ac xc'ulun li Jesucristo ut a'an chic li tz'akal xyucua'il aj tij chok' ke lao. Ut xkac'ul li rusilal li Dios li quixq'ue ke sa' li ac' contrato. Li Jesucristo inc'a' nac'anjelac sa' junak tabernáculo yibambil xbaneb li cuink arin sa' ruchich'och'. K'axal lok' cui'chic li na'ajej li nac'anjelac cui'. **12** Li Kacua' Jesucristo co sa' li Lok'laj Santil Na'ajej sa' choxa. A'an inc'a' quixmayeja xquiq'uel li chibat chi moco ral cuacax. Quixmayeja ban lix lok'laj quiq'uel. Jun sut ajcui' quixmayeja rib re xq'uebal li kacolbal chi junelic. **13** Sa' lix pábaleb junxil cuan nak riq'uin li c'a'ru neque'xbənu laj tij, neque'xmux ru lix c'anjel sa'li tabernáculo. Ut re xsachbal lix paltileb que'xmayeja li chibat ut li toro. Lix quiq'uel ut lix chahil li c'atbil tuk' ix cuacax narachrachic sa' xbeneb laj tij. **14** Cui lix quiq'uel li xul naru naxsach lix paltileb, k'axal nim cui'chic xcuanquil lix quiq'uel li Jesucristo xban nak a'an narisi li kamac. Li Santil Musik'ej quixtenk'a li Jesucristo nak quixmayeja rib chiru li Dios re xtojbal rix li kamac. Li Jesucristo tz'akal chabil. Mac'a' xmac ut lix quiq'uel narisi li kamac li nac'amoc chak re li cámec sa' kabən. Naxsakobresi li kac'a'ux re nak ca'aj cui' chiru li yo'yoquil Dios toc'anjelak. **15** Anakcuan cuan li ac' contrato xban xcamic li Jesucristo. Chixjunileb li bokbileb xban li Dios tacuank xcuybal lix maqueb, eb li que'cuan

rubel xcuquil li xbén contrato jo' ajcui' ləo li cuanco rubel xcuquil li ac' contrato. Ut təcuənk kayu'am chi junelic jo' quixyechi'i li Dios. Li Jesucristo quicam chiru cruz re kacolbal. Riq'uin lix lok'laj quiq'uel quixtoj rix li kaməc. ¹⁶ Læx ac nequenau nak junak cuink cuan c'a'ru re naxye c'a'ru tərechani li ralal xc'ajol junjunk. Ut a'an tauxmank nak acak xcam. ¹⁷ Li ətin a'in məc'a' xc'anjəl nak toj yo'yo li xyehoc re. Toj chirix ənban lix camic tac'anjelak. ¹⁸ Jo'can nak li xbén contrato quixakabəc chak xcuquil riq'uin xquiq'ueleb li xul nak que'mayejac. ¹⁹ Nak laj Moisés quixye chixjunil li chak'rab reheb li tenamit, quixchap li coc' ruk' li pim hisopo xc'aba' ut ca'ch'in li caki lana. Quixtz'a sa' xquiq'uel li chibət ut li ral cuacax yubil riq'uin ha'. Quixrachrachi li quic' chiru li hu tz'ibabil cui' li chak'rab ut quixrachrachi ajcui' sa' xbeneb li tenamit. ²⁰ Tojo'nak quixye reheb: Riq'uin li quic' a'in xakabanbil xcuquil li contrato li quixq'ue li Dios chok' ere, chan. (Ex. 24:8) ²¹ Ut laj Moisés quixrachrachi li quic' chiru li tabernáculo jo' ajcui' chiru chixjunil li c'a'ak re ru nac'anjelac sa' li tabernáculo re xlok'oninquil li Dios. ²² Jo' tz'ibabil sa' li chak'rab, tento xsantobresinquil riq'uin quic' chixjunil li quic'anjelac chiruheb. Məc'a' xcuybal li məc cui inc'a' təhoyek' li quic'.

Riq'uin lix camic li Jesucristo quixtoj rix li kaməc

²³ Jo'can nak tento nak que'xrachrachi lix quiq'uel li xul chiru li tabernáculo jo' ajcui' chiruheb li c'a' re ru cuan chi sa' re xsantobresinquileb. Li tabernáculo yal retaliil

li choxa. Ut li choxa santobresinbil riq'uin jun mayej k'axal cui'chic lok'. A'an lix lok'laj quiq'uel li Kacua' Jesucristo. ²⁴ Li Cristo inc'a' nac'anjelac sa' junak tabernáculo yibanol xbaneb li cuink. Nac'anjelac ban sa' choxa. Li tabernáculo quicuan, a'an yal retaliil li choxa. Li Jesucristo co sa' choxa ut anakcuan aran yo chi jaloc atin chikix chiru li Dios. ²⁵ Rajlal chihab na-oc lix yucua'il aj tij sa' li Lok'laj Santil Na'ajej ut naxmayeja xquiq'uel li xul. Aban moco jo'can ta quixbānu li Jesucristo. A'an jun sut ajcui' quixmayeja lix lok'laj quiq'uel nak quicam. ²⁶ Cui ta quixmayeja rib nabal sut, nabal sut raj quicam chalen sa' xticlajic li ruchich'och'. Aban inc'a' quixbānu chi jo'can. Li Jesucristo quic'ulun re xrakbal li xben contrato ut jun sut ajcui' quixmayeja rib. Ut riq'uin a'an cuan xcuybal li mac. ²⁷ Chixjunil li tenamit jun sut ajcui' te'cāmk ut li Kacua' Dios tarakok atin sa' xbeneb. ²⁸ Jo'can nak li Jesucristo jun sut ajcui' quixmayeja rib re risinquil lix maqueb li q'ula tenamit. Mokon tol-elk cui'chic, aban macua' chic re cuyuc mac tachalk. Tol-elk ban li Jesucristo re xtz'akobresinquil li kacolbal chikajunil li yoco chi yo'oninc re.

10

¹ Li chak'rab li quiq'uehe' re laj Moisés yal retaliil li usilal talaje'chalk mokon. Sa' li chak'rab a'an naxye nak te'mayejak rajlal chihab aban moco riq'uin ta li mayejac quitcobresic lix yu'ameb. ² Cui ta riq'uin li mayejac taelk lix maqueb inc'a' raj chic neque'mayejac rajlal chihab. Abanan neque'rec'a sa' li rameb nak toj cuan lix maqueb.

Jo'can nak inc'a' que'xcanab li mayejac. ³ Lix yáalal li mayejac neque'xbánu a'an re xjulticanquil chiruheb nak toj cuanqueb xmäc. ⁴ Lix quiq'uel li chibat ut li toro inc'a' narisi li mäc. ⁵ Jo'can nak li Kacua' Jesucristo, nak ac chalc re sa' ruchich'och', quixye re li Acuabej Dios:

Lain ninnau nak lataq inc'a' nacacuaj lix quiq'uel li mayej xul. Inc'a' nacuulac chacuu li c'a'ak re ru chi mayejil. Jo'can nak tinaq'ue chi tz'ejcualoc'.

⁶ Inc'a' nacuulac chacuu li c'atbil mayej chi moco li c'a'ak re ru chi mayejil re risinquel li mäc.

⁷ Ut quinye: Cue'quin, at Kacua', tinbánu li nacacuaj jo' tz'ibánbil sa' li Santil Hu chicuix. (Sal. 40:6-8)

⁸ Jo'ca'in quixye li Cristo re li Dios: Inc'a' nacuulac chacuu li c'atbil mayej chi moco li c'a'ak re ru chi mayejil re risinquel li mäc. Xelaje'xbánu a'in xban nak jo'can tz'ibánbil sa' li chak'rab junxil. Quixye li aq'at a'in usta ac tz'ibánbil sa' li chak'rab nak te'mayejak. ⁹ Ut quixye ajcui': Cue'quin, at Kacua'. Tinbánu li nacacuaj, chan. Jo'can nak li Dios quirisi xcuánquil li mayejac xul ut chok'rekaj li mayej a'an quixq'ue li Jesucristo chi cámč chiru li cruz. ¹⁰ Li Jesucristo quixbánu li quiraj li Dios nak quixmayeja rib chiru li cruz. Jun sut ajcui' quixmayeja rib, ut riq'uin lix camic cuybil li kamäc ut santobresinbilo. ¹¹ Sa' xyankéb laj Israel, chixjunileb laj tij cuulaj cuulaj neque'mayejac ut li mayej a'an inc'a' narisi li mäc. ¹² Abanan li Jesucristo jun sut ajcui' quixmayeja rib nak quicam re xcuybal xsachbal li mäc. Chirix a'an co sa' choxa ut quic'oja sa' xnim uk' li Dios. ¹³ Ut aran yo

chiroybeninquil nak tacuulak xk'ehil nak tixyek' sa' rok eb li xic' neque'iloc re. ¹⁴ Xban nak jun sut ajcui' quixmayeja rib li Jesucristo nak quicam chiru li cruz, māc'a' chic xmaq'ueb chiru li Dios li santobresinbileb. ¹⁵ Jo'can ajcui' li Santil Musik'ej naxch'olob xyalal chiku nak a'an tz'akal yal xban nak jo'ca'in naxye sa' li Santil Hu:

¹⁶ A'in li contrato tinq'ue reheb, chan li Dios. Tacuulak xk'ehil nak tinq'ue lin chak'rab sa' lix c'a'uxeb ut tinq'ue ajcui' sa' li rāmeb.

¹⁷ Ut quixye ajcui':
Inc'a' chic tānak sa' inch'ol lix maqueb chi moco lix māusilaleb. (Jer. 31:33-34)

¹⁸ Jo'can nak cui ac cuybil sachbil li kamāc, māc'a' chic xc'anjal li mayejac re risinquil li māc.

Naru tocuank chi sum atin riq'uin li Dios

¹⁹ Jo'can utan ex herman, anakcuan naru tocuank chi sum atin riq'uin li Dios xban nak quihoye' lix lok'laj quiq'uel li Jesucristo nak quicam chiru li cruz sa' kac'aba'. ²⁰ Riq'uin lix camic li Jesucristo quixsach xcuauquil li t'icr li quicuan sa' li tabernáculo ut quixq'ue li ac' na'leb re xtaubal li junelic yu'am ut anakcuan naru tocuank chi sum atin riq'uin li Dios. ²¹ Li Jesucristo, a'an lix yucua'il aj tij chok' ke lāo li ralal xc'ajol li Dios. ²² Jo'can nak chikaq'ue kib rubel xcuauquil li Dios chi anchal kach'ol ut chi māc'a'ak kaxiu xban nak nakec'a nak māc'a' chic li kamāc. Ch'ajbil chic li kām xban xquiq'uel li Jesucristo ut cubsinbil chic kaha'. ²³ Jo'can nak cauhak taxak kach'ol sa' li kapābal xban nak li Dios naxq'ue li c'a'ru naxyech'i ke. ²⁴ Chikasic' chanru takatenk'a

kib re nak takara kib ut chikabənu usilal chi kibil kib. ²⁵ Cuanqueb li inc'a' neque'xic sa' li ch'utubaj ib. Abanan inc'a' takabənu jo' neque'xbəñu eb a'an. Junelic ban takach'utub kib re xlok'oninquil li Dios. Chikaq'ue xcacuub li kach'ol chi kibil kib. Tento takabənu a'an xban nak chi seb tol-elk li Jesucristo. ²⁶ Cui junelic yoco chi mācōbc chi ac nakanau xyalal li rātin li Dios, māc'a' chic xcuybal li kamāc xban nak nakanau nak māc yoco chixbəñunquil. ²⁷ Cui junelic yoko chi mācōbc, ca'aj chic li rakba ətin ut lix xamlel li tojba māc yoco chiroybeninquil bar cui' te'c'atek' li xic' neque'iloc re li Kācua' Dios. ²⁸ Junxil inc'a' quiile' xtok'obal ru li ani quik'etoc re xchak'rab laj Moisés. Cui cuan cuib malaj oxib li que'xye nak yal nak xk'et li chak'rab, quirake' ətin sa' xbəñ ut que'xcamsi. ²⁹ Numtajenak cui'chic ra te'xc'ul li neque'tz'ektənan re li Ralal li Dios ut neque'xsach xcuānquil lix quiq'uel xban nak riq'uin xquiq'uel li Jesucristo xakabənbil xcuānquil li ac' contrato ut santobresinbilo ləo. Numtajenak cui'chic ra te'xc'ul li neque'xmajecua li Santil Musik'ej li naq'uehoc ke li rusilal li Dios. ³⁰ Ləo nakanau nak li Dios quixye chi jo'ca'in:

Ca'aj cui' ləin naru ting'uehok xtojbal rix lix māqueb ut ləin tinrahobtesiheb riq'uin li c'a'ru quilaje'xbəñu.

Ut quixye cui'chic li Kācua':

Ləin tinrakok ətin sa' xbəñ lin tenamit. (Dt. 32:35-36)

³¹ K'axal xucuajel nak tərakok ətin li yo'yoq'uil Dios sa' xbəñeb li neque'tz'ektənan re. ³² Aban chinak sa' eç'h'ol chanru xec'ul junxil nak toje'

xepab li Cristo. Nabal chi raylal quilajec'ul ut inc'a' xch'inan ech'ol. ³³ Cuan sa' eyank li xic' que'ile' ut que'hobe' chiruheb li tenamit. Ut laex quextz'akon riq'uin li raylal li que'xc'ul. ³⁴ Laex quiyot'e' ech'ol chi rilbal le rech aj pabanelil li cuanqueb chi prexil. Ut inc'a' quiraho' sa' le ch'ol nak quimak'e' cheru li c'a'ru ere xban nak nequenau nak sa' li choxa cuan ematan k'axal cui'chic lok'. Le mañan li cuan sa' choxa inc'a' nalaj inc'a' naoso'. ³⁵ Jo'can nak cauhak taxak ech'ol sa' le pabal ut riq'uin a'an cuan ek'ajcamunquil. ³⁶ Laex tento tecuy li c'a'ru na-ux ere re nak tebanu li naraj li Dios. Ut riq'uin a'an tec'ul li yechi'nbil ere xban li Dios. ³⁷ Jo'ca'in tz'ibanol sa' li Santil Hu: Chi seb tol-ekl li Cristo. Inc'a' tabayk chak.

³⁸ Li tjc xch'ol xban inpabankuil cuan xyu'am chi junelic. Cui naxcanab inpabankuil, inc'a' tasahok' inch'ol riq'uin, chan li Dios. (Hab. 2:3-4)

³⁹ Aban, lao macua'o xcomoneb li neque'xcanab xpabankuil li Dios. Eb a'an te'xic sa' xbalba. Lao nakapab li Dios ut tocolek'.

11

Li Pabal

¹ ¿C'a'ru li pabal? Li pabal a'an xnaubal nak relic chi yal takac'ul li yoco chiroybeninquil. Usta inc'a' nakil ru aban nakanau nak takac'ul. ² Li Dios quisaho' xch'ol riq'uineb li kaxe'tonil yucua' xban nak que'paban. ³ Xban nak nakapab li ratin li Dios, nakanau nak li Dios quixyib li choxa jo' ajcui' li ruchich'och'. Macua' riq'uin c'a'ak re ru quixyib li ruchich'och'. Yal riq'uin li ratin quixyib. ⁴ Xban

lix pābal laj Abel, quixq'ue jun xmayej chabil chiru li quixq'ue laj Caín. Xban lix pābal, li Dios quixye nak tīc xch'ol ut quixc'ul lix mayej. Usta camenak chic laj Abel, aban toj cuan retalil chok' ke lāo chanru nak quipāban chiru li Dios. ⁵ Xban lix pābal laj Enoc inc'a' quicam. Quic'ame' ban sa' choxa xban li Dios. Inc'a' chic que'xtau xban nak ac xc'ame'. Nakanau nak li Dios quisaho' sa' xch'ol riq'uin nak toj maji' nac'ame' sa' choxa xban nak jo'can tz'ibanol sa' li Santil Hu. ⁶ Mājok'e tāsahok' xch'ol li Dios riq'uin li ani inc'a' napāban. Māani naru nachal riq'uin li Dios cui inc'a' naxpāb nak cuan li Dios ut nak a'an naxq'ue xk'ajcamunquil li ani nasic'oc re. ⁷ Xban lix pābal laj Noé, li Dios quixye re c'a'ru talajc'ulmānk. Ut laj Noé quixpāb li quixye li Dios usta toj maji' nac'ulman. Quixyib li nimla jucub cab re xcolbal rib a'an, jo'eb ajcui' li ralal xc'ajol. Ut lix pābal laj Noé quixc'utbesi nak li cuanqueb sa' ruchich'och' inc'a' que'pāban. Jo'can nak que'cam. Xban nak quipāban, li Dios quixye nak tīc xch'ol laj Noé. ⁸ Xban lix pābal, laj Abraham qui-abin chiru li Dios nak quixye re nak tāelk sa' li tenamit cuan cui'. Co sa' li na'ajej li quiyechi'ic re xban li Dios. Nak qui-el chak sa' li tenamit, co chi inc'a' naxnau bar xic re. ⁹ Xban lix pābal laj Abraham quicuan sa' li na'ajej li quiyechi'ic re xban li Dios, ut quicuan aran jo' jun jalan xtenamit. Quixyib xmuhebal t'icr xban nak yal numec' re. Jo'can ajcui' que'xbānu laj Isaac ut laj Jacob xban nak a'aneb li te'ēchanink re li c'a'ru quixyechi'i li Dios. ¹⁰ Laj Abraham inc'a' quixyib chabil ochoch, xban nak yo' chiroybeninquil jun xna'aj sa' li santil

choxa. Li na'ajej a'an yibanol xban li Kacua' Dios ut tacuank chi junelic. ¹¹ Xban lix pabaleb, laj Abraham ut lix Sara quicuan jun lix c'ula'al sa' xtixilaleb, usta lix Sara a'an jun ixk inc'a' naq'uiresin. Aban que'xnau nak te'xc'ul li c'a'ru quiyechi'ic rebeb xban li Dios. ¹² Usta ac tix chic laj Abraham nak quiyo'la li ralal, abanan que'tam li ralal xc'ajol. Lix q'uialeb li ralal xc'ajol jo' xq'ual li chahim chiru li choxa ut jo' xq'ual li samaib li cuan chire li palau. Ut inc'a' naru rajlanquileb xban lix q'uialeb. ¹³ Chixjunileb a'an quilaje'cam. Usta inc'a' que'xc'ul chixjunil li c'a'ru quiyechi'ic rebeb xban li Dios, que'xpab nak tac'ulmank li yechi'nbil. Jo'can nak saheb sa' xch'ol. Que'xye nak li ruchich'och' a'in macua' tz'akal xna'ajeb; yal numeleb ban sa' ruchich'och'. ¹⁴ Que'xye chi jo'ca'in xban nak toj yoqueb chiroybeninquil jun lix na'ajeb. ¹⁵ Li na'ajej a'an macua' li na'ajej que'el cui' chak. Cui ta a'an, quiru raj que'suk'i cui'chic aran. ¹⁶ Aban que'roybeni jun na'ajej k'axal chabil, a' li santil choxa. Jo'can nak li Dios inc'a' naxutnanac chixyebal nak a'an lix Dioseb xban nak quixc'ub jun li na'ajej chok' rebeb. ¹⁷ Laj Abraham quiyale' lix pabal xban li Dios nak quixye re nak tixmayeja li ralal. Jun ajcui' li ralal cuan, aban xban nak naxpab li Dios, laj Abraham quixq'ue laj Isaac chok' xmayej. ¹⁸ Quixq'ue li ralal chok' xmayej, usta a'an li quiyechi'ic re xban li Dios re nak te'tamk li ralal xc'ajol. ¹⁹ Cui ta quicam laj Isaac, laj Abraham ac naxnau nak nim xcuankind li Dios re xcuaclesinquil cui'chic chi yo'yo sa' xyankeb li camenak. Naru

xyebal nak chanchan a'an quixbanu li Dios xban nak laj Abraham quixk'axtesi li ralal re cāmc. Aban quik'axtesic cui'chic re chi yo'yo xban li Dios. ²⁰ Laj Isaac quixpāb nak li Dios tixq'ue li quixyechi'i re. Jo'can nak quixye reheb laj Jacob ut laj Esau nak li Dios tāosobtesink reheb nak tācuulak xk'ehil. ²¹ Laj Jacob quixpāb nak tixc'ul li quiyechi'ic re xban li Dios. Jo'can nak ac cāmc re, laj Jacob quirosobtesiheb li ralal laj José. Ut chirix a'an, laj Jacob quixxulub rib sa' xben lix xuk' ut quixlok'oni li Dios. ²² Xban lix pabal laj José, nak ac cāmc re, quixjultica reheb laj Israel nak sa' jun cutan te'elk sa' li tenamit Egipto. Ut quixye ajcui' reheb nak te'xc'am lix bakel nak te'elk sa' li tenamit a'an. ²³ Xban lix pabaleb lix na' xyucua' laj Moisés, nak quiyo'la laj Moisés, oxib po que'xmuk chiru li rey. Que'ril nak c'ajo' xchak'al ru li c'ula'al ut inc'a' que'xucuac chi xk'etbal lix chak'rab li rey nak quixye nak te'camsik li c'ula'al li coc' telom. ²⁴ Xban lix pabal laj Moisés, nak quicuinkilo' inc'a' quiraj nak te'xye nak lix rabin li rey, a'an lix na'. ²⁵ Inc'a' quiraj tz'akonc sa' li sahil ch'olej cuanqueb cui' laj Egipto. Quixnau nak li sahil ch'olej a'an yal nanume'. Quiraj ban xc'ulbal li raylal li yoqueb chixc'ulbal laj Israel lix tenamit li Dios. ²⁶ Naxnau nak k'axal lok' nak tixc'ul li raylal sa' xc'aba' li Cristo chiru xc'ulbal lix biomal li tenamit Egipto. Ut yo chiroybeninquil lix k'ajcāmunquil li tāq'uehek' re xban li Dios. ²⁷ Xban xpabal laj Moisés qui-el chak sa' li tenamit Egipto ut inc'a' quixucuac chiru li rey usta yo xjosk'il sa' xben. Quixcacuubresi xch'ol xban nak naxnau nak li Dios cuan riq'uin. Chanchan

li yo chirilbal ru, aban li Dios ma ani na-iloc ru.

²⁸ Xban lix pābal, laj Moisés quixbañu li pascua jo' quiyehe' re xban li Dios. Nak elqueb re Egipto quixtakla xq'uebal xquiq'uel li carner chiruheb li puerta. Ut nak quinume' li ángel chi camsinc, ma jun li xbēn ralaleb laj Israel quixcamsi. ²⁹ Xban lix pābaleb laj Israel, que'nume' sa' xyi li caki palau. Chaki ch'och' li que'nume' cui'. Ut jo'can ajcui' que'raj xbanunquil eb laj Egipto. Aban inc'a' que'ru xban nak li ha' quixjunaji rib sa' xbeneb ut aran que'oso' chixjunileb. ³⁰ Xban lix pābaleb laj Israel, cuukub cutan que'xsuti rix li tenamit Jericó. Ut sa' xcuuk li cutan quit'ane' li tz'ac li sutsu cui' li tenamit. Ut que'rechani li tenamit. ³¹ Lix Rahab a'an jun ixd naxc'ayi rib nak quicuan. Xban nak quipāban, quixtenk'aheb laj Israel li que'chal chixq'uebal retal li tenamit. Xban lix pābal, lix Rahab inc'a' quicam sa' xyānkeb li inc'a' que'pāban re li Dios. ³² Toj cuan raj nabal tinserak'i ere, aban inc'a' tātz'aklok li cutan re tinserak'ik chirix lix pābaleb laj Gedeón, laj Barac, laj Sansón, ut laj Jefté; ut tinye ajcui' raj ere chanru lix pābaleb laj David, laj Samuel, ut eb li profeta. Aban inc'a' tātz'aklok li cutan. ³³ Nak que'pletic riq'uin li jalnil tenamit, xban nak cuanqueb xpābal, que'rechani. Sa' xyalal que'taklan ut xban lix pābaleb que'xc'ul li quiyechi'ic reheb xban li Dios. Cuan li que'q'uehe' sa' xyānkeb li cakcoj re te'ti'ek', aban māc'a' que'ux re xbaneb li cakcoj.

³⁴ Xban lix pābaleb inc'a' que'at nak que'cute' sa' xam. Cuan que'camsic raj chi ch'ich', aban inc'a' que'yoq'ue'. Riq'uin lix pābaleb, que'q'uehe' xcacuilañ li māc'a'eb xmetz'eu. Nak que'pletic

riq'uineb li jalanyl tenamit, que'numta xcuānquil sa' xbeneb xban li Dios toj retal que'rechani li tenamit. ³⁵ Cuanqueb ixt, xban lix pabaleb, que'cuacli cui'chic lix camenakeb chi yo'yo. Ut cuanqueb ajcui' que'rahobtesic toj retal nak que'cam xban lix pabaleb. Inc'a' que'raj nak te'ach'abak xbaneb li xic' neque'iloc reheb xban nak inc'a' que'raj xtz'ektañanquil li Dios. Ac neque'xnau nak te'xc'ul jun yu'am k'axal chabil sa' choxa nak te'cuaclik cui'chic chi yo'yo. ³⁶ Cuan que'hobe', cuan que'saq'ue', ut cuan que'baq'ue' ut que'q'uehe' sa' tz'alam. ³⁷ Cuan que'camsic chi pec ut cuan que'sete' riq'uin jachleb che'. Que'yale' ralenquil aban inc'a' que'xtz'ektaña li Dios. Ut cuan ajcui' que'camsic riq'uin k'esnal ch'ich'. Quilaje'xbeni rib yalak bar ut riq'uin rix chibat ut rix carner que'xyib li rak'eb. Neba'eb ut rahobtesinbileb. K'axal ra que'xc'ul. ³⁸ Macula' raj xc'ulubeb li inc'a' useb xna'leb nak te'cuank laj pabanel sa' xyankeb. Xban nak que'rahobtesic, eb laj pabanel quilaje'elelic chiruheb ut que'cuān yalak bar sa' li chaki ch'och', sa' tzul, ut que'cuān ajcui' sa' li ochoch pec. ³⁹ Nak nakabi a'in chirixeb laj pabanel, nakanau nak tz'akal re ru lix pabaleb. Aban toj maji' quitz'akloc ru lix colbaleb li quiyechi'ic reheb xban li Dios. ⁴⁰ Li Dios quiraj nak yok'eb chi oybeninc re nak te'tz'akonk kochben riq'uin li k'axal lok' yechi'ibil ke. A'an li kacolbal sa' xc'aba' li Jesucristo.

12

Chikac'oxla li Jesucristo

¹ Numtajenak xq'uialeb laj pabanel li que'cuán chak najter. Kaq'uehak retal chanru líx pabaleb. Chanru nak que'pabán chak a'an, jo'can ajcui'takabánu lão. Cui junak naraj alinac, narisi chixjunil li naqlobresin re ut naxyal xk'e chi alinac. Jo'can ajcui'takabánu lão. Takacanab chixjunil li c'a'ak re ru nach'i'ch'i'in ke sa' li kapabal ut takacanab ajcui' li māc li nachapoc ke. Chikacuyak taxak li c'a'ak re ru tento xcuybal re nak takabánu jo' naraj li Dios. ² Kaq'uehak kach'ol chixtañkenquil li Jesucristo laj c'amol be chiku. A'an naq'uehoc re li kapabal ut naxtz'akobresi ru. Usta xutanal li camc quixc'ul chiru li cruz, abanan inc'a' quixq'ue sa' xch'ol. Ut quixcuy li raylal sa' kac'aba' lão xban nak líx sahilal xch'ol quiq'uehe' re mokon. Ut anakcuan cuan sa' choxa sa' xnim uk' li Dios.

Li Dios nocoxtij xban nak lão li ralal xc'ajol

³ Cheq'uehak retal chanru nak quixcuy li rabobtesic li Jesucristo xbaneb laj māc. Jo'can ajcui'læex. Checuyak li ra xic' ut inc'a' chich'inank ech'ol sa' le pabál. ⁴ Læex toj maji' nequexcamsic xban nak nequeq'ue ech'ol chixcolbal erib chiru li māc. ⁵ ¿Ma ac xsach sa' ech'ol li c'a'ru quixye li Dios re xch'olobanquil le na'leb? Li Dios naqtinac eriq'uín jo' naqtinac junak yucua'bej riq'uín líx coc'al. Jo'ca'in tz'ibánbil sa' li Santil Hu:

Ex cualal inc'ajol, metz'ektana le tijbal li ninye ere, chi moco chich'inank ech'ol nak nequexink'us.

⁶ Lain nintij li ani ninra ut nink'us chi cau li ani ninc'ul chok' cualal inc'ajol. (Pr. 3:11-12)

⁷ Tento nak t̄ecuy li tijec' re nak t̄etau əna'leb. Jo'can nak nequexxtij li Dios xban nak l̄æx li ralal xc'ajol. ¿Ma cuan ta bi' junak alalbej inc'a' natije' xban lix yucua'? ⁸ Cui li Dios inc'a' nequextij jo' nak naxtijeb chixjunileb li ralal xc'ajol, a'an naraj naxye nak l̄æx m̄acua'ex tz'akal ralal xc'ajol. Út li Dios m̄acua' ajcui' tz'akal eyucua'. ⁹ Sa' kaca'ch'inal, li kana' kayucua' nocoe'xk'us ut naka-oxlok'iheb. ¿Ma toja' ta chic li kachoxahil yucua' inc'a' takapâb nak toxk'us? Cui nakapâb li kak'usbal naxq'ue li Dios, cuãnk kayu'am chi junelic. ¹⁰ Sa' kaca'ch'inal li kana' kayucua' nocoe'xk'us jo' neque'cuulac chiruheb a'an. Aban li Kacula' Dios nocoxk'us chi tz'akal. Nocoxk'us re nak t̄at̄icok' kach'ol ut toxsantobresi xban nak a'an santo. ¹¹ Relic chi yal nak nakac'ul li kak'usbal moco sa ta nakec'a. Ra ban nakec'a nak nocok'use'. Abanan cui nakacuy k'usec' mokon nakatau xyalal nak riq'uin li k'usec' nachabilo' li kayu'am ut t̄atuklak ajcui' li kach'ol.

K'axal xucuajel xtz'ektanquil li ratin li Dios

¹² Checacuubresihak le rok eruk' li m̄ac'a' xmetz'eu. Lix yâlal li jaljoquil ru ətin a'an a'in: Checacuubresi le ch'ol re nak inc'a' t̄ach'inank ech'ol sa' le pabal. ¹³ Ticobresihomak ru le be re nak li yek inc'a' chic tixbach' li rok; t̄acacuuk ban. Naraj naxye: t̄icak taxak le yu'am re nak li toj ac'sa' lix pabal inc'a' t̄ach'inank xch'ol. Te'cacuuk ban xch'oleb sa' lix pabaleb. ¹⁴ Chexcuãnk sa' tuktuquil usilal riq'uineb le ras eritz'in. Chexcuãnk sa' t̄iquilal ut sa' santilal, xban nak cui m̄ac'a' esantilal ma jok'e teril ru li Dios. ¹⁵ Chetenk'a erib cheribil erib sa' le pabal re

nak mä jun ere tätz'ektanäk li rusilal li Dios. Chebänu cuënt re nak inc'a' teyo'ob li c'ahinc ib sa' eyäk. Cui jo'can tebänu naru naniman ru li ch'a'ajquilal ut märe nabaleb te'xic cui'chic sa' li mac xban a'an. ¹⁶ Mä ani taxak junak sa' eyäk yal tixlak'ab rib chi inc'a' sumsu. Chi moco chebanu jo' quixbänu laj Esaú nak quixtz'ektäna lix lok'laj mañan. Laj Esaú quixc'ul raj lix mañan xban nak a'an li xben alalbej. Abanan quixtz'ektäna lix mañan xban nak quixc'ayi yal riq'uin jun cua'al chi cua. ¹⁷ Læx nequenau nak mokon quixrahi raj cui'chic xc'ulbal li rosobtesinquil laj Esaú riq'uin lix yucua'. Abanan inc'a' chic quiru xban nak ac quixtz'ektäna. Täyabak nak quixtz'ama cui'chic, aban inc'a' chic quiru. Mac'a' chic xjalenquil. ¹⁸ Læx inc'a' quebänu jo' que'xbänu eb laj Israel najter k'e cutan. Eb a'an que'jiloc riq'uin li tzul Sinaí nak li Dios quixq'ue lix chak'rab re laj Moisés sa' li tzul a'an. Quicuan xam. Quik'ojojino' ut quicuan ajcui' cak-sut-ik'. ¹⁹ Eb a'an que'rabi xyäb li trompeta ut que'rabi ajcui' xyäb xcux li Dios nak quiatinac riq'uineb. Ut que'xtz'ama nak me'ätinäc chic xban li Dios. ²⁰ Que'xye chi jo'can xban nak inc'a' que'xcuy rabinquil li chak'rab li naxye nak täcamsik chi pec li ani täxic aran sa' li tzul, usta xul. (Ex. 19:12) ²¹ Xban nak k'axal xucuajel rilbal li yo chi uxc sa' xben li tzul, laj Moisés quixye: C'ajo' nak ninxucuac ut ninsicsot xban inxiu, chan. (Dt. 9:19) ²² Abanan læx inc'a' xebänu jo' que'xbänu eb laj Israel. Nak læx nequepab li Cristo, chanchan nak ac xexjiloc riq'uin li tzul Sión. Sión naraj naxye li santil choxa cuan cui' li yo'yoquil Dios. Ac' Jerusalén

nayeman ajcui' re li na'ajej a'an. Aran cuanqueb li q'uila ok'ob chi ángel. Yoqueb chixlok'oninquil li Dios. ²³ Junaj chic eru laex aj pabanel. Ut tz'ibanol le c'aba' sa' choxa. Textz'akonk sa' choxa erochbeneb li tiqueb xch'ol li ac tz'akobresinbil ruheb xban li Dios. Cuanquex chi sum atin riq'unin li Dios li tarakok atin sa' xbeneb chixjunileb li cuanqueb sa' ruchich'och'. ²⁴ Ut cuanquex chi sum atin riq'unin li Kacua' Jesucristo, li quixakaban xcuانquil li ac' contrato. K'axal nim xcuانquil lix quiq'uel li Jesucristo. Riq'unin a'an cuan xcuybal le mac. Macua' jo' li quic' li quixmayeja laj Abel najter k'e cutan. ²⁵ Metz'ektaña li ratin li Dios jo' que'xbanu eb laj Israel. Eb a'an inc'a' que'xcuy rabinquil xchak'rab li Dios ut que'xtz'ektaña li ratin nak quich'olobac chak xyalal chiruheb aran sa' li tzul. Ut quirake' atin sa' xbeneb. Cui inc'a' que'cole' eb a'an, ¿ma toja' ta chic lao tocolek' cui takatz'ektaña li Dios li naatinac chak toj sa' choxa? ²⁶ Najter nak li Dios quiatinac sa' li tzul Sinaí, lix yab xcux quirec'asi li na'ajej a'an. Ut li Dios quixye: Sa' jun sut chic macua' ca'aj cui' li ruchich'och' tincuec'asi. Tincuec'asi ajcui' li choxa. (Ex. 19:18) ²⁷ Nak naxye "jun sut chic" naraj naxye nak tixsach li ruchich'och', li choxa, ut chixjunil li c'a'ak re ru yibanol. A'ut li inc'a' yibanol, jo' li musik'anbil xban li Dios, a'an tacanak chi junelic. ²⁸ Chikabantioxi chiru nak tocuank riq'unin li Dios chi junelic sa' lix nimajcual cuanquilal. A'an ma jaruj taosok'. Cuank ban chi junelic. Takalok'oni li Dios chi anchal kach'ol xban nak ca'aj cui' a'an xc'ulub lok'onic. Kaq'uehak kach'ol chixbanunquil li

c'a'ru naraj a'an ut takaxucua ru. ²⁹ Li kaDios chanchan jun li xam xban nak tixsach chixjunil li inc'a' us.

13

Chanru xna'leb laj pabanel

¹ Mecanab xrabal erib cheribil erib xban nak junajex sa' le pabal. ² Mek'etk'eti erib chixc'ulbal le rula'. Chec'uleb ban sa' usilal. Cuanqueb li que'xc'ul li rula'eb, abanan inc'a' neque'xnau nak ángel li que'cuulac chi ula'aninc reheb. ³ Cherilak xtok'obal ruheb li cuanqueb sa' tz'alam. Cherec'ak sa' le ram nak chanchan ajcui' laex li cuanquex sa' tz'alam. Chinak ajcui' sa' ech'ol li neque'hobe' ut li neque'rahobtesic. Chanchan nak laex ajcui' yoquex chi c'uluc re li raylal a'an. ⁴ Us li sumlaci aban tento che-oxlok'i le sumlajic. Mac'a' c'a'ru chebalak'i cui' erib. Li Dios tarakok atin sa' xbeneb li neque'xmux ru lix sumlajiqueb, jo' ajcui' sa' xbeneb laj co'bet laj yumbet. ⁵ Mera ru li tumin. Chec'ojobak ban ech'ol riq'uin li jo' q'uil cuan ere xban nak li Dios quixye: Junelic tatin-tenk'a, ut ma jok'e tatincanab ajunes. (Dt. 31:6) ⁶ Jo'can nak naru takaye chi anchal kach'ol: Li Kacua' Dios natenk'an cue. Inc'a' ninxucua li c'a'ru te'xbanu li xic' neque'iloc cue. (Sal. 118:6) ⁷ Chijulticok' ere eb li que'c'amoc be cheru. A'an que'xch'olob xyalal li ratin li Dios. Cheq'uehak retal lix pabal ut lix yu'ameb nak que'cuan sa' ruchich'och'. Jo'can ajcui' chebanuhak laex. ⁸ Li Jesucristo inc'a' najala chi moco najala lix na'leb. Ac a'an ajcui' chak chalen najter k'e cutan, a'an anakcuan ut a'anak chi junelic. ⁹ Meq'ue erib chi

balak'ic xbaneb laj balak', xban nak jalan jalank li tijleb neque'xye. Macula' li c'a'ru nakatzaca li najaloc re li kayu'am. A' ban li rusilal li Dios najaloc re ut naxq'ue xcacuil kach'ol. ¹⁰ Lao cuan jun ka-artal. A'an nak quixmayeja rib li Kacula' Jesucristo chiru li cruz. Eb laj tij inc'a' naru te'xtzaca li mayej a'an jo' que'xbanu chak najter sa' li tabernáculo nak que'xmayeja li xul. (Naraj naxye nak li colba-ib inc'a' natauman riq'uin xbanunquil li chak'rab. Natauman ban riq'uin xpabánquil li Cristo.) ¹¹ Lix yucua'il aj tij sa' xyankéb laj Israel naxc'am lix quiq'uel li xul sa' li Lok'laj Santil Na'ajej ut naxmayeja re risinquil li mac. Aban lix tibel li xul naxc'at toj jun pac'al li tenamit. ¹² Jo'can ajcui' li Jesucristo quic'ame' toj jun pac'al li tenamit ut aran quicam chiru li cruz. Ut riq'uin lix lok'laj quiq'uel li Jesucristo nocoxsantobresi. ¹³ Kacanabak li kanajter na'leb ut chikatakehak li Jesucristo usta toj yoko chi c'uluc raylal sa' xc'aba' a'an. ¹⁴ Li ruchich'och' a'in macula' tz'akal kana'aj. Yoco ban chiroybeninquel jun chic li kana'aj k'axal chabil. A'an li choxa. ¹⁵ Jo'can ut junelic chikalok'onihak li Dios sa' xc'aba' li Jesucristo, ut chikanimak ru. Cui takabánu chi jo'can, a'an li kamayej chiru li Dios. ¹⁶ Misach sa' ech'ol xbanunquil li usilal ut xtenk'anquil erib cheribil erib xban nak a'an jun li mayej nacuulac chiru li Dios. ¹⁷ Chex-abink chiruheb laj c'amol be cheru, ut chebanuhak li c'a'ru neque'xye ere xban nak eb a'an neque'tenk'an ere sa' le pabal. A'aneb li te'xk'axtesi xcuent cherix chiru li Dios. Chetenk'aheb re nak sahakeb sa' xch'ol sa' lix canjeleb xban nak cui rahakeb sa' xch'ol, rahak

ajcui' chok' ere læex. ¹⁸ Ex herman, tintz'ama ch̄eru nak chextijok chikix lāo. Nakc'a nak t̄ic kach'ol ut nakaj nak junelic cuānko sa' t̄iquil. ¹⁹ Ut nintz'ama ajcui' ch̄eru nak chextijok chicuix. A'taxak li Dios chitenk'ank cue re nak t̄aruk tinxic cui'chic chi junpat cherilbal.

Xchak'rabinquileb li herman

²⁰ A' li Kacua' Dios a'an laj q'uehol tuktquil usilal, li Dios li quicuaclesin cui'chic re chi yo'yo li Jesucristo sa' xyānkeb li camenak. Riq'uin lix lok'laj quiq'uel li Jesucristo xakabanbil xcuanquil li ac' contrato chi junelic. Li Jesucristo na-iloc ke jo' junak cuink narileb lix carner. ²¹ Chicuank taxak li rusilal li Dios eriq'uin re nak t̄ebānu li c'a'ru naraj. Chixbānuhak taxak li Dios li c'a'ru naraj eriq'uin sa' xc'aba' li Jesucristo. Lok'oninbil taxak li Jesucristo chi junelic k'e cutan. Jo'can taxak. ²² Ex herman, nintz'ama jun usilal cheru. Checuyak rabinquil li cuatin re xch'olobanquil ena'leb. Moco q'ui ta li qatn xintz'iiba sa' li hu a'in. ²³ Nacuaj ajcui' xyebal ere nak li hermano Timoteo ac x-el sa' tz'alam. Cui nachal chi junpat arin, cuochbenak nak toxic cherilbal. ²⁴ Cheq'uehak xsahil xch'oleb laj c'amol be cheru sa' le pābal ut chixjunileb li kech aj pābanelil. Eb laj pābanel li cuanqueb arin Italia neque'xtakla xsahil ech'ol. ²⁵ Li rusilal li Dios chicuank eriq'uin. Jo'can taxak.

**Li Santil hu
Bible in Q'eqchi' (GT:kek:Q'eqchi')**

copyright © 2000 Wycliffe Bible Translators, Inc.

Language: Q'eqchi'

Translation by: Wycliffe Bible Translators, Inc.

Q'eqchi' [kek], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Q'eqchi'

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xli

2014-04-30

**PDF generated using Haiola and XeLaTeX on 11 Nov 2022 from source files
dated 29 Jan 2022**

f1b065df-5ef5-5c8a-a273-af2b9aefff55